

REZOLUTË

PËR VLERËSIMIN E VEPRIMTARISË SË INSTITUCIONIT TË BANKËS SË SHQIPËRISË

Kuvendi i Republikës së Shqipërisë, në përputhje me nenin 103 të Rregullores së Kuvendit, pasi dëgjoji Raportin për Veprimtarinë e Bankës së Shqipërisë për vitin 2006, *konstaton se*:

Veprimtaria e Bankës së Shqipërisë është ushtruar në përputhje me kërkesat e nenit 161 të Kushtetutës, si dhe të ligjit nr.8269, datë 23.12.1997 “Për Bankën e Shqipërisë”, të ndryshuar. Banka e Shqipërisë në veprimtarinë e saj i është përmbajtur objektivave të vendosur nga Kuvendi në rezolutën e fundit për vlerësimin e veprimtarisë së këtij institucioni. Gjatë veprimtarisë njëvjeçare të Bankës së Shqipërisë ekonomia shqiptare ka vazhduar rrugën e konsolidimit makroekonomik.

Prodhimi i përgjithshëm bruto i vendit vlerësohet të jetë rritur me 5 për qind në terma realë. Kjo rritje është shoqëruar me stabilitet çmimesh, të shprehur në një inflacion mesatar vjetor prej 2,5 për qind.

Kushtet monetare, të karakterizuara nga norma historikisht të ulëta interesi dhe qëndrueshmëri të kursit të këmbimit, kanë favorizuar rritjen e investimeve dhe të konsumit në ekonomi. Në mënyrë të veçantë, ato janë reflektuar në rritjen e shpejtë të kredisë me rreth 70 miliardë lekë.

Zhvillimet fiskale kanë rezultuar me tejkalim të ndjeshëm në mbledhjen e të ardhurave, duke kontribuar në konsolidimin e mëtejshëm të financave publike, kontrollin e deficitit buxhetor dhe rritjen e investimeve publike.

Kuvendi vlerëson veprimtarinë e Bankës së Shqipërisë gjatë vitit 2006 në drejtim:

- të ruajtjes së stabilitetit ekonomik dhe financiar të vendit dhe ruajtjes së ritmeve të zhvillimit ekonomik, në përputhje me normat e parashikuara;
- të ruajtjes së stabilitetit të çmimeve nëpërmjet mbajtjes së inflacionit në kufijtë vjetorë të planifikuar;
- të politikave monetare të ndjekura, të cilat kanë qenë të besueshme dhe fleksibël, duke iu përgjigjur zhvillimeve ekonomike e financiare të vendit. Ndërhyrjet në normën bazë të interesit dhe balancimi i kërkesës dhe ofertës për para kanë ndikuar në ruajtjen e stabilitetit makroekonomik dhe zbatimin e një regjimi të ri të politikës monetare për një periudhë afatmesme;
- të nxitjes së mëtejshme të kreditimit të ekonomisë së vendit, duke ruajtur stabilitetin dhe balancat makroekonomike e financiare të saj;
- të mbikëqyrjes efektive të rrjetit të sistemit bankar në Shqipëri, kontributit për zgjerimin e mëtejshëm të tij, përmirësimit të efektivitetit dhe rritjes së besueshmërisë së publikut ndaj sistemit bankar;
- të përmirësimit të mëtejshëm të legjislacionit bankar në Shqipëri, duke e përputhur atë me direktivat e BE-së, si dhe të nxjerrjes së akteve nënligjore në zbatim të tij.

Kuvendi rekomandon që për vitin në vijim Banka e Shqipërisë t’u kushtojë vëmendje:

- Ruajtjes së stabilitetit makroekonomik të vendit dhe përmbushjes së objektivave për vitin 2007, të cilat rrjedhin nga marrëveshja midis Qeverisë Shqiptare, FMN-së dhe Bankës së Shqipërisë.
- Hartimit e zbatimit të politikave monetare afatmesme, me synim përshpejtimin e ritmeve të zhvillimit ekonomik të vendit dhe përmbushjen e detyrimeve që rrjedhin nga Marrëveshja e Stabilizim-Asociimit me BE-në.
- Dhënies së opinioneve dhe sugjerimeve për Qeverinë në lidhje me politikën monetare, si dhe hartimit të strategjive afatgjata dhe rajonale në sektorë të tillë si energjia, infrastruktura, tregtia, eksportet, investimet e huaja.
- Monitorimit të kujdesshëm të kreditimit të ekonomisë dhe nxitjes së përmirësimeve të strukturës së kredisë, duke synuar, në radhë të parë, veprimtaritë prodhuese e veçanërisht sektorin e bujqësisë.
- Kontributit në zgjerimin e mëtejshëm të sistemit bankar dhe shtrirjen e tij në gjithë zonat e vendit.
- Ndikimit në shtimin e shërbimeve që sistemi bankar u ofron qytetarëve dhe sektorëve privatë e publikë të ekonomisë.

- Ndikimit me politikat që harton dhe zbaton në reduktimin e informalitetit në ekonomi, si dhe zvogëlimin e transaksioneve me para në dorë.

- Luftës për parandalimin e përdorimit të sistemit bankar për pastrimin e parave të rrjedhura nga veprimtaritë kriminale dhe pasurive prej tij, në përputhje me direktivat e Bashkimit Europian, si dhe objektivat për luftën ndaj terrorizmit.

- Monitorimit të shoqërive të kreditit dhe institucioneve jobankare, si dhe plotësimit të kuadrit ligjor për to.

- Vazhdimin e procesit të modernizimit të legjislacionit bankar në Shqipëri, me qëllim harmonizimin e tij me atë të BE-së.

Kuvendi shpreh bindjen se Banka e Shqipërisë edhe gjatë vitit 2007 do të vazhdojë të jetë një institucion i përgjegjshëm në fushën e hartimit dhe zbatimit të politikave monetare dhe të konsolidimit të mëtejshëm të sistemit financiar të vendit.

3 maj 2007